

Ayacucho - Soldado Qellqapa - Soldiers Scriptures

Efesios 6:10-18

- 10 Chaynaqa, wawqe-panillaykuna, Señorninchikpa tukuy atiyinpi kallpanchakuychik.
- 11 Harkachikunaykichikpaq Diospa qosusqaykichik llapallan armakunawan pachallikuychik, chaynapi allinta takyaptikichik, wateqasuqnichik diablo mana urmachisunaykichikpaq.
- 12 Peleachkankichikqa manam aychayuq tulluyuq runakunawanchu, aswanqa tutayypi kamachikuqkunapa, gobernaqkunapa, munayniyuqkunapa hinaspa altokunapi mana allin espiritukunapa contranpim.
- 13 Chaynaqa, Diospa qosusqaykichik llapallan armankunawanyá pachallikuychik, chaynapi urmachiy munasusqaykichik punchawpi allinta takyanaykichikpaq hinaspa lliwta venceruspaykichik qaqa hina sayanaykichikpaq.
- 14 Allintayá sayaychik, chumpiwan hinayá cheqap kaqwan watakuychik, qasqo harkachikunawan hinayá allin ruwaywan pachallikuychik.
- 15 Zapatokuchkaq hinayá hawkayay qokuq allin noticia apanaykichikpaq chaylla kaychik.
- 16 Llapallanmantapas aswanqa ñiynikichikyá escudoykichik hina kachun, chaynapi diablopa rupachkaq flechankunamanta amachakunaykichikpaq.
- 17 Salvasqa kasqaykichikyá kachun umaykichik harkaqa casco hina, hapiychiktaqyá Diospa palabrantapas, chayqa Chuya Espiritupa espadanmi.
- 18 Chuya Espiritupa yanapakuyinwanyá Diosta mañakuychik tukuy tiempo hinaspa rikchan-rikchanlla kaychik, ama hukmanyaspa llapallan ñiqkunapaqpas Diosta mañapuychik,

Salmos 91:1-16

- 1 Tukuy imapa hawanpi munaychakuqpa pakaykusqan yachakuq runaqa, Tukuy Atiyniyuqpa llantuykusqanmi kawsakunqa.
- 2 Paymi Tayta Diosta ninqa: Qamqa waqaychaqniymi kanki, pakakunay wasim kanki, hapipakunay Diosmi kanki, nispa.
- 3 Paymi libraykusunki pakasqa toqllamantapas, chaynataq wañuchikuq onqoymantapas.
- 4 Rapranwanmi pakaykusunki, puranwanmi wankuykusunki, cheqap kayninmi waqaychaspa harkaykusunki.
- 5 Tutayypi manchakuytapas manam manchakunkichu, punchawpi flechakunatapas manam manchakunkichu,
- 6 tutapi muyuq onqoytapas manam manchakunkichu, punchawpi

- wañuchikuqtapas manam manchakunkichu.
- 7 Ichoqnikipim waranqa wañunqa, alleqnikipim chunka waranqa wañunqa qamtam ichaqa mana imapas pasasunkichu.
 - 8 Cheqaptapas qamqa qawayllam qawanki, mana allin ruwaqkunapa castigo chaskisqanta.
 - 9 Tayta Diosta pakaykusuqnikipaq churasqaykiraykum, tukuy imapa hawanpi munaychakuqta harkaykusuqnikipaq hapisqaykiraykum,
 - 10 mana imapas imanasunkichu, onqoypas manam wasikiman chayamusunkichu.
 - 11 Qamraykum angelninkunata kamachinqa mayta riptikipas waqaychasunaykipaq.
 - 12 Rumipi chakiki mitkananmantapas makinwanmi harkaykusunki.
 - 13 Leonkunapa, maqta urukunapa kasqantam purinki, uña leonkunata, venenoyuq maqta urukunatam sarunki.
 - 14 Diosmi nin: Hapipakuwasqanraykum libraykusaq, reqsiwasqanraykum tukuy imapa hawanpi churaykusaq.
 - 15 Qayakamuwaptinmi uyariykusaq, sasachakuyninpim payta yanapasaq, libraspaymi payta hatunchaykusaq.
 - 16 Unay watakunatam kawsachisaq, salvasqaytam qawachisaq, nispa.

Salmos 18:1-50

- 1 Dios Taytalláy, kallpanchaqniymi qamqa kanki, ¡ñoqqa kuyaykim!
- 2 Dios Taytalláy, waqaychaqniymi kanki, pakakunay wasim kanki, libraqniymi kanki. Kuyasqay Diosnilláy, amparakunaymi kanki, hapipakunaymi kanki, harka qniy escudom kanki, atiywan salva qniymi kanki, pakakunaymi kanki.
- 3 Ñoqallayqa Tayta Diostam qayakusaq, payllam yupaychana Diosqa, payllam enemigoymantapas salvaykuqniyqa.
- 4 Wañuymi waskankunawan chaqnarullawan tuñichikuqmi lloqlla hina mancharichiwani.
- 5 Wañuymi waskankunawan chaqnarullawan, wañuchikuq trampamanmi wichi ykullani.
- 6 Sasachakuypi kaspaymi Tayta Diosta mañakullani, yanapaykuwananpaqmi Diosnillayta qayakullani, payñataqmi templonmanta uyariykamullawan, qayakullasqaytam uyariykamullawan.
- 7 Kay pacham katkatatarqa, orqokunapa sapinpas lliwmi kuyurirqa, paypa piñakuyninwanmi llumpayta mancharikurqa.
- 8 Paypa senqanmantam qosni lloqsimurqa, siminmantañataqmi rupachkaq nina lloqsimurqa, chaynata lloqsimuspam nina sansa ratarirurqa.
- 9 Cielota kicharispam uraykamurqa, tutay-tutay puyukunapa hawantam uraykamurqa.
- 10 Querubinpi sillakuykuspam pawarimurqa, wayrapa rapranpim payqa pawarimurqa.

- 11 Tutayaypim pakakuykurqa, tutayaywanmi muyuriyachikurqa, yakunkama yanay-yanay puyuanmi wankukuykurqa.
- 12 Kancharichkaq qayllanmantam puyukuna hoqarikurqa, runtu parawan rupachkaq sansam chayamurqa.
- 13 Hanaq pachamanta qaparimuptinmi Tayta Diospa rimariynin rayo hinaraq uyarikurqa, qaparimuptinmi runtu parawan rupachkaq sansa wichirimurqa.
- 14 Flechanwanmi enemigonkunata cheqerachirqa, rayokunata kachaykuspam wañurachirqa.
- 15 Tayta Diospa qaqchakuyninwanmi lamar qochapa ukunkunapas rikuriramurqaraq, Tayta Diospa qapariyninwanmi kay pachapa cimientonkunapas rikukurqaraq,
- 16 Tayta Diosmi hanaq pachamanta hapiyakamullawarqa, achka-achka yakupa chawpinmantam hurqoykullawarqa.
- 17 Atiyniyuq enemigoymantam libraykullawarqa, cheqniwaqniykunamantam libraykullawarqa; paykunaqa ñoqamanta aswan kallpayuqmi karqaku.
- 18 Sasachakuypi kachkaptiyimi paykunaqa pawaykamuwarqaku, Tayta Diosllam ñoqataqa yanapaykullawarqa.
- 19 Sasachakuymantam hurqoykullawarqa, kuyawaspanmi libraykullawarqa.
- 20 Tayta Diosqa allin kawsasqayman hinam premiaykullawan, munasqanta ruwasqayman hinam pagaykapullawan.
- 21 Diosniypa yachachikuynintam waqaycharqani, manam huchallikurqanichu, Diosmantaqa manam rakikurqanichu.
- 22 Kamachikuyniqqa ñawpaqniypim kachkan, yachachikuynikimantaqa manam karunchakurqanichu.
- 23 Qayllaykipiqa chuyatam kawsakurqani, mana allinkunamantam karunchakurqani.
- 24 Chuya kasqayman hinam, allin kawsasqayman hinam, Tayta Diosqa pagaykapullawan.
- 25 Diosnilláy, kuyapayakuqkunawanqa kuyapayakuqmi kanki, qampi hapipakuqkunawanqa cumpliqmi kanki.
- 26 Chuya runawanqa chuyam kanki, millay runawanqa sakrim kanki.
- 27 Uchuychakuq runakunatam salvaykunki, hatun tukuqkunatañataqmi penqayman churanki.
- 28 Diosnilláy qanmi achkiykuwaqniyqa kanki, tutayayniytam kanchaykuwanki.
- 29 Qanwanqa nana-nanaq tropakunatam cheqechisaq, qanwanqa perqawan corralasqa llaqtakunatam tuñichisaq.
- 30 Diospa ñanninqa mana pantayniyuqmi, Diospa promesankunaqa hapipakunapaqmi, paypi hapipakuqkunataqa waqaychanmi.
- 31 Diosnilláy, qamllam cheqap Diosqa kanki qam hina waqaychakuqqa manam hukqa kanchu.
- 32 Tayta Diosmi kallpanchaqniyqa, paymi allin ñanninta pusawaqniyqa.
- 33 Luwichupata hinaraqmi chakiytipas kallpachin, orqonkunata kallpaspaypas

- manam urmasaqchu.
- 34 Paymi guerrapi peleanaypaq yachachiwan, bronce manta arcowan flechanaypaqmi makiyta kallpanchan.
 - 35 Qanmi harkaykuwaspa salvaykuwanki, alleq makikiwanmi takyaykachiwanki, kuyakuynikiwan vencechiwaspam hatunchaykuwanki.
 - 36 Mana lluchkanaypaqmi ñanniytapas kichaykapuwanki.
 - 37 Enemigoykunatam qatispa hayparurqani, wañuchinaykamam mana kutimurqanichu.
 - 38 Pasaypaqtam puchukarachini manaña hatariy atinankamam ñutuparurqani, chaki pampaywanmi lliwta saruparurqani.
 - 39 Peleanaypaqmi kallpata qoykuwanki, enemigoykunatam ñawpaqniypi qonqorachinki.
 - 40 Enemigoykunatam qayllaymanta ayqechirqanki, chaynapim cheqniwaqniykunata tukururqani.
 - 41 Qayakuptinkupas manam pipas yanaparqachu; Tayta Diosta qayakuptinkupas manam uyarirqachu.
 - 42 Wayrapa apanan ñutu allpata hinam ñutururqani, ñanpi mituta hinam llinqaparurqani.
 - 43 Llaqtapa peleakuyninmantam libraykuwarqanki, nacionkunapa kamachiqnin kanaypaqmi churaykuwarqanki, mana reqsisqay llaqtakunawanmi serviykachiwarqanki.
 - 44 Mana reqsisqay runakunapa mirayninkunam hatunchawanku simiyta uyarispam chaylla kasuwanku.
 - 45 Mana reqsisqa runakunam hukmanyaruspanku pakakusqankumanta lloqsimunku.
 - 46 ¡Tayta Dios kawsachun! ¡Waqaychaqniy Dios qapaqchasqa kachun!
¡Salvaykuqniy Dios hatunchasqa kachun!
 - 47 Ñoqapa rantiypim enemigoykunamanta vengakurun, llaqtakunatam chaki pampayman churaykamun.
 - 48 Enemigoykunamantam libraykuwan, contraypi hatariqkunapa hawanpiraqmi churaykuwan, wañuchi qkunamantam libraykuwan.
 - 49 Chayraykum llapa nacionkunaman Tayta Diosmanta willakusaq, takikunawanmi sutikita hatunchasaq.
 - 50 Akllakusqayki reyta yanapaspam venceykachinki, Davidtawan mirayninkunatam wiñaypaq kuyapayaykunki.